

TEZAU LITURGIC

11 IUNIE

ACATISTUL SF.222 MUCENICI DE LA PEKIN-CHINA



MOSCOVA, 2000



Акафист

в честь и похвалу преславных мучеников Китайских, от ихетуаней (боксеров) во граде Пекине умученных и убиенных

Кондак 1

Избранныя от великаго народа восточнаго, прехвальныя страсотерпцы, богоносный отче Митрофане с паствою верною, от рук единоплеменников ваших, подобно древним мучеником пострадавшия, с ними же купно Творца всех восславляющие, милостивно примите моление наше, да с любовью величаем вас, кровию вашею землю Китайскую осветивших, верность же Христу до конца сохранивших, зовуще вам сице:
Радуйтесь, всеславные мученицы Китайстии, подобно звездам лучезарным, на Востоце возсиявшия;

Икос 1

Ангелов и человек Творец, в деснице Своей судьбы народов и царств содержай и в каждом колене верных чад Своих имеяй, произрасти вас, богоблаженнии страсотерпцы от потомков пленников российских, в державе Китайстей новую отчизну снискавших и среди народа ея

единоверцев своих обретших. Вы бо, мученицы благоверныя, славу земную ни во что же вменившее, сокровища нетленные на Небесех стяжали есте, яко посрамили есте кровию вашею безчеловечную ярость людскую и демонское коварство. Мы же ныне, вся сия воспоминающе, похвалы таковыя с надеждою и любовию вам возносим:

Радуйтесь, Отца Небеснаго чада верныя и возлюбленныя;

Радуйтесь, Христовы страстотерпцы и мученицы добропобедныя;

Радуйтесь, лучезарныя лампы Духа Святаго;

Радуйтесь, пламень бесовский водами крещения угасившия;

Радуйтесь, торжество Пасхи Новыя в стране языческой явившия;

Радуйтесь, народу востока путь к истинней вере указующия;

Радуйтесь, и нас во уповании на Спасителя утверждающия;

Радуйтесь, пречудное милосердие Божие к нам приклоняющия;

Радуйтесь, всеславнии мученицы Китайстии, подобно звездам лучезарным на Востоце возсиявшия;

Кондак 2

Видением в веках грядущих от Господа одаренный, всехвальный Исаяя – пророк возвести, яко придут верныя чада Божия издалече от земли Синиим; ныне мы же сего пророчения сбытия зрим, яко в земли на востоце дальнем, Синиим рекомей, вы, страстотерпцы богоносныя, пришли есте к Агнцу Божию, богопросвещенным Исайей проповеданному, людие добрыя, путем Крестным за Христом Распятым последовали есте, воспевая Ему: Аллилуйя.

Икос 2

Разумом Божественным просвещенныя и одаренныя, святою любовью ко Христу пламенеющия, мученицы святыя и велехвальныя, кумиром и их служителем бесоводимым не поклонистесь, яко древле в пленение Пекинское приведенныя, правнуцы и сонаследницы казаков Абалазинских, веру Православную соблюдоша, и за Христа Распятого, живот свой положиша, обрели есте свободу чад Божиих, и ныне Святую Троицу умоляете о всех, восхваляющих вас сице: Радуйтесь, младенцы Церкви Христовой, от новаго Ирода заклание приявшия; Радуйтесь, землю Отчизны вашея кровию мученическою, аки водами крещения омывшия;

Радуйтесь, чрез златыя врата во Иерусалим
Небесный во гласе радования вшедшия;
Радуйтесь, чада Израиля Новаго, на лоне
Авраамовом упокоение вечное обретшия;
Радуйтесь, аки адаманты многоценныя в
сокровищнице Небесней сияющия;
Радуйтесь, со всеми мученики и праведники
хвалу Творцу воспевающие;
Радуйтесь, путь истинный, к житию вечному
ведущий, в стране дорог шелковых, озаряющия;
Радуйтесь, Предвечнаго Бога более империи
земной любити научающия;
Радуйтесь, всеславныя мученицы Китайстии,
подобно звездам лучезарным, на Востоце
возсиявшия;

Кондак 3

Силою благодати Божественныя укрепленныя,
мученицы всеславныя, подвиг высоких и
славных во смирении сердечном не искали есте,
николиже древним мучеником великим
уподобитися, но токмо веры Христовы течение
соблюсти возжелали есте, и верою же
движимыя, самих себе в жертву благоугодную
Спасителю принесли есте. Мы же, сия
поминающе, усердно просим вы: укрепите нас в
уповании на Христа, да сподобимся купно с
вами воспевати Ему: Аллилуйя.

Икос 3

Имуще надежду непостыдную на всеблагое предстательство ваше, велехвальныя мученицы Китайстии, пред престолом Царя Царствующих и Господа Господствующих, величаем и прославляем вас, богосиянныя звезды Солнца Правды, небо восточное светом предвечной Истины Христовой озарившия, и во вся концы земли лучи подвиг ваших богоприятных испустившия, страстотерпцы богоблаженныя двести двадесят и два, молитесь Господеви, да оживотворит теплохладную веру нашу и примите славословия сия:

Радуйтесь, лилии благоуханныя, благодатию Божиею возвращенныя;

Радуйтесь, слово Божие, на новом наречии проповедавшия;

Радуйтесь, пламень адский водою жизни вечней угасившия;

Радуйтесь, пагоды языческаго потоками крови вашаго освятившия;

Радуйтесь, прехвальныя наследницы Соломоновы, нерукотворныя храмы Христу сотворившия;

Радуйтесь, через истинное покаяние грехи наши в прах обращающия;

Радуйтесь, со светильники горящими Спасителя сретати нас научающия;

Радуйтесь, подлинною премудростию души
наша окрыляющая;
Радуйтесь, всеславныя мученицы Китайстии,
подобно звездам лучезарным на Востоце
возсиявшия;

Кондак 4

Бурю сомнений и страхований силою благодати
победили есте, всехвальныя мученицы
Пекинския, егда видя чад и мужей пред очима
своима от исчадий сатанинских убиваемых, и
иних многих от ран и мучений во смерти их
предварявших, отчаяния же богомудро
удалишесь, упование всяческое на Христа
Распятого за ны возложиша, обезсиленнии и
безгласнии в духе мученичестем всех
укреплявшему Творцу и Подвигоположнику
воспевая: Аллилуиа.

Икос 4

Слышаша окрест воин и оружий шум, уповаша
людие христианстии на Бога паче, неже на
нечестивых властителей империи Поднебесней.
Мы же, ныне просим вас, богоносныя
страстотерпцы, в стране восточней за Христа от
единоплеменников пострадавшия, ризы своя в
крови Агнчей убелившия, и жало смерти вечной
млатом мук ваших притупившия, сие молим
вас: испросите нам животворную благодать

Божию, яко да воспрянем духом и с надеждою
вопием вам сице:

Радуйтесь, вами же безумие боксеров
злочестивых посрамися;

Радуйтесь, вами же Христос Спаситель
прославися;

Радуйтесь, мудрых превосходящие разумом;

Радуйтесь, верных вдохновляющие мысли и
сердца;

Радуйтесь, и сердца неверующих умягчающие;

Радуйтесь, злых ко добру приводящие;

Радуйтесь, страданиями вашими слезы и у
неверующих исторгающая;

Радуйтесь, и житием и смертью вашею Бога
прославившие;

Радуйтесь, всеславныя мученицы Китайския,
подобно звездам лучезарным, на Востоце
возсиявшия;

Кондак 5

Боготечныя звезды Китайския земли,
прехвальныя страсотерпцы, хитоны ваши
истечением кровей мученических обагрившия,
столпи истины Христовей бысте и тесным
прискорбным путем востекли есте на Горний
Сион. Плоть свою распясте со страстьми и
похотьми, обрели есте благодать Святаго Духа.
Сице молим вас: путь спасения нам укажите

нам, да единым сердцем и едиными усты Богу, спасшему вас, вопием: Аллилуиа.

Икос 5

Видевши вас, мученицы Распятого Христа, бесподобнии воины китаистии, яко смело и дерзновенно Бога Истиннаго пред единоплеменниками и властителями империи поднебесней исповедуете. Вы же не крепостию ратною и оружием изошренным гордились есте, но токмо слабостию и немощею вашею, и, Христом укрепляемы, похвалялись есте. Сия убо поминающее, просим вы, укрепите надежду нашу, в вере и любви утвердите ны, да поем вам сице:

Радуйтесь, сквозь огонь и воду мучений в покой вечный вшедшия;

Радуйтесь, в терпении твердее адаманта явившияся;

Радуйтесь, в страданиях, яко злато в горниле, очистившияся;

Радуйтесь, по успении вашем чудесы преславныя сотворившия;

Радуйтесь, огнем молитвы ваша стрелы вражия попяляющия;

Радуйтесь, светильницы Христовы, внутренний мрак душ наших озаряющия;

Радуйтесь, от уныния, тяготы сердечней и малодушия избавляющия;

Радуйтесь, от неверия и сомнений благодатно
всех нас исцеляющая;
Радуйтесь, всехвальная мученица Китайстии,
подобно звездам лучезарным на Востоке
возсиявшая;

Кондак 6

Проповедует вся Церковь Божия вашу славу,
блазии страстотерпцы. Веру несомненную,
надежду крепкую в Иисуса Христа вы
сподобитесь имети в душе, жизни своя
положите за слово Владыки Христа,
исповедницы бысте. Егда Предвечный Бог, к
вечной жизни воззовет весь род человеческий,
тогда убо помяните и нас, недостойных, стояще
одедную Престола Господня, тамо Ему вопиюще:
Аллилуиа.

Икос 6

Возсиял еси богодарованною мудростию и
ревностию пастырскою во граде Пекине,
всехвальный отче наш Митрофане, от
равноапостольнаго и богоноснаго святителя
Николая Японскаго, утверждение в вере и сан
пресвитерский приявый; в годину же гонений
явился еси истинным служителем Истиннаго
Господа, Коего злочестивыя ихетуани врагом
наименоваша. Мы же, вспоминая, яко углие
пылающая ненависти их дождем добродетелей,

молитв и терпения угасили есте, величаем вас, богоносныя страсотерпцы, и глаголем вам сице:

Радуйстеся, всеблагия свидетелие и мученицы Логоса Предвечнаго, от единоплеменных пострадавшия;

Радуйстеся, рубиновыя диадимы от Подвигоположника Христа принявшия;

Радуйстеся, ученицы святаго Николая, им в Истине Божественней во веки утвержденныхя;

Радуйстеся, путем крестным за Иисусом Сладчайшим шествовавшия;

Радуйстеся, аки ветвие плодоносныя на древе Жизни процветшия;

Радуйстеся, лед грубости и неприязни в сердцах наших растопляющия;

Радуйстеся, духом благости и миролюбия нас обогащающия;

Радуйстеся, всехвальныя мученицы Китайстии, подобно звездам лучезарным на Востоце возсиявшия;

Кондак 7

Хотящее выну и во всем Спасителю нашему последовати, во след апостолу помышляли есте, яко аще живете Господеви живете, умираете с Господем сочтаетеся, всехвальные сродницы и ближние сподвижницы богоноснаго Митрофана, прехвальная матушко Татиана, иже чад своих в

благочестии воспитала еси и к мученическому подвигу предуготовила еси, Павле Ван Вэньхэн с материю Екатериною, супружницею Сарою и чадами Иоанном и Александрою, Иоакиме, розго юная вертограда Христова, Иннокентие и иных верных чад Христовых, иже мученически востекоша в чертози Отчии и за нас ныне молитесь, воспевая Царю Царствующим:
Аллилуйя.

Икос 7

Новый Рим языческий бе для вас, верныя чада Бога Истиннаго, град Пекин, новый Колизей явися подворие Бейгуань, яко вы, древлим мучеником Христовым, кумиром не поклонистесь и от рук служителей империи язычестей за веру святую, терпеливо поношения, оклеветания, мучения и смерть лютую прияша. Вы бо всем житием вашим явистесь свидетелями Христа, и носителями света Его, иже возсия пред соплеменники вашими, и нас озарет радостию надежды и упования на Христа, милующего и спасающего ны. Сего ради мы в похвалу вам зовем сице:
Радуйтесь, светом Христовым мрак язычества и безбожия озаряющия;
Радуйтесь, немолчным гласом в пустынях восточных к Богу Истинному присно взывающия;

Радуйтесь, молитвами вашими пути
проповедником Евангелия предуготовляющия;
Радуйтесь, идолослужебныя жертвенники и
кадильницы всепобедно попирающия;
Радуйтесь, аки многоценный ладан в
кадильнице Небесней благоухающия;
Радуйтесь, злобу мира сего верою в высшее
милосердие побеждати научающия;
Радуйтесь, во всяцем человеце зрети образ
Божий присно наставляющия;
Радуйтесь, Христа-Спасителя паче всего
земнаго почитити всех нас подвизающия;
Радуйтесь, всеславныя мученицы Китайстии,
подобно звездам лучезарным, на Востоце
возсиявшия;

Кондак 8

Странное и непостижимое разумению человеков
чудо днесь являете нам, доброгласнии
новомученицы китайстии. Удивляемся вам зело,
како в гонениях и теснотах сохранить возмогли
есте благодать Святаго Духа. Вы житием своим
святи есте, Отца всеблаженнаго блаженная чада
есте, Сына Божия вернии друзи есте, Духа
Святаго покорнии слуги, есте. Днесь велегласно
вас прославляем, всепобедныя ученицы
Христовы, Богу Предвечному о вас поюще:
Аллилуиа.

Икос 8

Вся радости мира сего презревшии, святии новомученицы, жертву спасительную, своя телеса, во всесожжение тучное отдати изволили есте, вас же мукам и казням и лютой смерти предаша, вы же, благовестницы Божии, исходяще оттуда не телом, но душею, не прах, прилепший вам от града, оттрясите им от ног ваших, но телеса ваша, за благовестие Христа умученная, остависте во свидетельство на ня в день судный, темже благоговейно взываем вам: Радуйтесь, всемощнии помощницы наша во всяком доброделании.

Радуйтесь, крепции защитницы наша пред престолом Божиим от всякаго обстояния.

Радуйтесь, прешедшии от земли на небо в обители райския;

Радуйтесь, Святую Троицу тамо выну созерцающии.

Радуйтесь, Пресвятая Богородицы вернии слуги;

Радуйтесь, благодати Святаго Духа преисполненнии.

Радуйтесь, небеснии граждани и жителие вечнаго града Иерусалима;

Радуйтесь, всего рода христианскаго украшение.

Радуйтесь, всеславныя мученицы Китайския,

подобно звездам лучезарным, на Востоце
возсиявшия;

Кондак 9

Всякое слово человеке немотствует, помышляя о
днех страданий ваших, мученицы достославнии,
егда слезами и воплем исполнися земля
китайская, вы бо чрез смерть временную
востекли есте в чертози Царствия Нетленного,
идеже к древу жизни вечной, аки новые ветви,
привишася и расцветоша тамо лепотою велиею,
нам же присно источаете аромат благоухания
духовнаго и радости, сего ради на
предстательство ваше уповая, Богу вопием:
Аллилуиа.

Икос 9

Витии многовещаннии не возмогут изреци вам
достойныя хвалы, мученицы Христовы,
богомудре отче Митрофание, матушко Татиано
со чады Исаией, Иоанном, и сродники Мариєю
купно со служители церковныма Виттом Хай,
Климентом Куй Лином, Матфеем Хай Цюанем
под меч бо преклонисте выи Христа ради,
преклоньшаго небеса и сошедшаго, и излиясте
кровь вашу, общницы Его страстей бывше. Мы
же, недостойнии, сия песненныя дары приносим
вам, глаголюще:

Радуйстеся, златыя мироварницы, дарми

исцелений наполнении;
Радуйтесь, Царствия Божия жемчужныя
бисеры многоценнии;
Радуйтесь, благозвучныя цевницы, Ангельских
ликов сожителие;
Радуйтесь, немолчная уста, херувимскую песнь
у Престола Владычня поющая;
Радуйтесь, златыя кадильницы, фимиам
молитвы о нас Богу приносящи;
Радуйтесь, и нас сущих в скорбех лучами
надежды осиявающие;
Радуйтесь, малодушие и безсилие в сердцах
наших прогоняющие;
Радуйтесь, демонскаго омрачения и страстей
тлетворных нас изымающие;
Радуйтесь, всеславныя мученицы Китайския,
подобно звездам лучезарным, на Востоце
возсиявшия;

Кондак 10

Спасти пришедшаго мир, любовь Сына Божия
разжигаемья, прехвальныя страсотерпцы
Евгение воине, Акилино Гуан, Агафия Жуй,
Анно Бай, Даниил Дэ, Николай Фу, Лев Хай Ли и
иных множество в мучениех тяжких и
страшных адамантов несожигаемых сильнее и
крече явились есте; от любве же Христовы
никакоже разлучилися, Тому пели есте умиленно
и ныне взываете Спасителю: Аллилуиа.

Икос 10

Стена есте молитвенная необоримая, мученицы доблии, иже некогда за стеною, ныне слезами ближних ваших омоченною, от воинов злочестивых муки претерпевая, плакасте молитвенно, ко Стене и Пристанищу христиан, Богородице Деве, прибегая. Мы же, со слезами во гресех наших каюсь, к вам со умилением взываем тако:

Радуйтесь, светильницы трисолнечного света, умы и сердца верных озаряющия.

Радуйтесь, потемненные грехми очеса душ наших светом евангельским просвещающия.

Радуйтесь, грехов оставление и в добродетельном житии укрепление нам подающия;

Радуйтесь, плодами духовными, веселящими нас, души наша оплодотворяющия;

Радуйтесь, трудолюбивых земледельцев плодами земными награждающия;

Радуйтесь, трудящихся во спасение дарами небесными исполняющия.

Радуйтесь, в поте лица хлеб свой добывающим благами земными увеселяющия;

Радуйтесь, слезы ближних ваших молитвами на небесех утешающия

Радуйтесь, всеславныя мученицы Китайския,

подобно звездам лучезарным, на Востоце
возсиявша;

Кондак 11

Пение похвальное приносим вам, всеславныя
страстотерпцы, за пределами града Пекина, в
селении Дундинань от ихетуаней
звероподобных, избиения тяжкия и смерть
лютую приявша, вы бо, святи мученицы
Алексее Чжан, Ефимие Чжан со чады Евдокиею,
Никитою, Михаилом и младенцем Марию,
Стефане Ван Юйгуан и Ирино Юйсян, аки
агнцы на заклание приведостеся и самих себе
принесоша Господеви в жертву всесожжения,
воспевая венчавшему вас венцы нетленными
Подвигоположнику Христу: Аллилуйя.

Икос 11

Светозарному небеси уготовали души ваша,
святии новомученицы Китайския, всякия муки
приявшии, огня и меча и иных ведомых и
неведомых тяжких обстоятельствах
страдальческую кончину приявшии и
замученныя, непоколебими в вере Христовой
пребывшии, небесной славы достигшии и
венцами мученическими увенчанныя, примите
и от нас похвалы сия:

Радуйстесь, яко вы Царствие Небесное земному
предпочли есте.

Радуйтесь, яко славу земную ни во что вменили есте.

Радуйтесь, Христа Господа всею душею возлюбившия.

Радуйтесь, Ему Единому усердно послужившия.

Радуйтесь, орли небопарнии, от земнаго долу смело горе взлетевшии.

Радуйтесь, ластовицы сладкогласнии, всю вселенную исполнившии велелепотою молитв ваших.

Радуйтесь, яко вас Господь, еще на земли, прослави благодатию чудотворений и дарами исцелений.

Радуйтесь, яко души ваша, солнцу подобящися, светом сияют незаходимым.

Радуйтесь, всеславныя мученицы Китайския, подобно звездам лучезарным, на Востоце возсиявшия;

Кондак 12

Благодать Господа нашего Иисуса Христа, и любовь Бога и Отца, и причастие Святаго Духа испросите нам, вси святии в земли Китайстей просиявшии, поименованнии зде и не поименованнии, да будите нам, яко звезды многосветлии, путевожди в сем житии нашем земнем, да и нас приведете ко Господу Христу,

дабы купно с вами воспевали Жизнедавцу во веки: Аллилуия.

Икос 12

Поюще великий и пресветлый полк ваш, все святии мученицы Китайския, от соплеменник ваших, иже яростию безчеловечною на вы разгорешася, яко огненному запалению в храме и в домах ваших вас предаша, побиению каменному, усечению мечному, в блата смрадныя и кладезеподобныя рви ввергоша, телес иссечению и иным страданиям нестерпимым вас умучаша. Мы же благодарне величаем прославльшаго вас Господа, Егоже милость и прощение нам грешным испросите и примите похвалы сия:

Радуйтесь, присно благоухающие хризантемы Новаго Едема;

Радуйтесь, прекрасныя стеблие лотоса, в долине вечной радости расцветшия;

Радуйтесь, Искупившего ны Богочеловека в век безбожия исповедавшия;

Радуйтесь, юноши и девы, в чистоте непорочней ко Богу яко мученицы отшедшия;

Радуйтесь, и плотию и сердцем за Христа страдавшия и мзду нетленную обретшия;

Радуйтесь, паче древних мудрецов державы вашей мудрость вечную стяжавшия;

Радуйтесь, в подвизех и страданиях ваших

начаток столетия мученическаго явившия;
Радуйтесь, от камней соблазнов духовныя
дороги наши очищающия;
Радуйтесь, к истинному богопознанию
соплеменников ваших приводящия;
Радуйтесь, всеславныя мученицы Китайстии,
подобно звездам лучезарным на Востоце
возсиявшия;

Кондак 13

О, пречуднии и кротции страстотерпцы
Христовы, преславныя Мученицы Китайския,
всем с верою и любовью вас призывающим
скорые и теплыя помощницы, примите от нас
недостойных малое сие со усердием приносимое
вам благодарение и заступите ны от всех врагов
видимых и невидимых, да с вами в невечернем
дни Царствия Божия воспоем Господеви:

Аллилуя.

Сей Кондак глаголем трижды, по сем Икос 1 и
Кондак 1

